

Skirbi pa Josefina Croes

"COLUMNNA DI FINCHI" ATENCION PA NOS HENDENAN Y NAN PROBLEMA

"Mi tin cu bisa cu esaki ta e intencion di e columna aki di hala mas serca nos hendenan y nan problemanan y casi mi por bisa na un manera internacional ya cu for di otro paisnan e "Columna di Finchi" tambe sa ricibi algun FAX cu informenan importante, cartanan confidencial, entre otro noticianan, sugerencia y algun consoho.

Mi mes no ta un celebridad, poco conoci den publicidad, semper tras di e computer como redactor y cu un curazon dispuesto na yuda tur hende cu aserca mi cu nan problema.

Semper di mi bida mi tin e disposicion di atende, of yuda te na unda cu mi por esnan den necesidad e por ta un ambulante sin cuminda y atencion.

Of mi ta sinti ora ta trata di adulto y muchanan cuero riba weso for di paisnan pover manera Nairobi, India, Haiti y demas pais.

Mi ta pensa tambe riba esnan insensible cu no ta sinti miedo pa kita derecho y pan di esnan pover y den necesidad y semper for di mucha mi a comparti cu otronan te na unda cu mi tabata por.

Pa loke ta trata e columna mi ta haya cu hendenan

desanima y den problema por wordo yuda te hasta cu un palabra di encurashamento y motivacion, compartiendo cu otronan e peso di e problema, dunando un tiki oido y atencion ta trece hopi solucion".

"Semper mi tin cu referi na e dinamica Sra. Nuhad Mansur tempo cu el a comunica mi su deseo di tin un columna como un medio den cual esnan interesa den Pueblo di Aruba por trece problemanan y cu DIARIO ta publica.

Cu e bendicion y e luz berde aki, e columna a nace bira un exito como cu e ta hopi lesa segun bon comentarionan ricibi y a haya bon acogida serca miles di lectoran na Aruba y tambe internacionalmente.

Mi por bisa cu tur clase di problemanan cu sernan humano sa pasa den nan, hopi ta e lectoran cu ta aserca DIARIO pa a travez di e columna aki laga publica nan tristeza y dolor.

Mundo henter y nos tur ta yen di problema y tur hende kier soluciona nan problema y tin hopi cu mayoria biah na sa con pa cana pa soluciona nan problema.

E caminda cu hopi hende ta cana pa busca solucion pa



nan problema ta tranca hopi biah, pasobra despues di un canamento basta largo pensando cu solucion ta na caminda ta haya portanan sera na diferente lugar cu a encontra nan mes den un of otro problema.

Esaki ta nifica cu problemanan lo no caba nunca, pero e problema no mester ta asina cu Bo ta keda stanca un caminda so.

Mi ta ilustra esaki di e siguiente forma :

Tin mayor cu continuamente ta trece e keho cu e instancia cu ta ricibi e diferente check di alimentacion, ta haya esaki hopi lat y asina tambe mayornan ta ricibi e placa pa e muchanan mucho lat.

Mayornan tabata tin un problema andando cu esaki, pero otro problema a surgi sin cu ningun hende tabata spera.

Un dia e problema bira mas

grandi despues cu ladronnan a bay cu tur e placa na e instancia aki, ningun hende por yuda, pero a pasa un tempo promer cu nan a haya nan placa.

Cu esaki mi kier ilustra cu bida ta yen di problema, tristo, doloroso, un ta caba otro ta cuminsa y cu mester di atencion.

Algo cu mi por a confronta cune ta cu tin hopi hende ta cana rond cu deseo di ser scucha.

Mi ta pensa cu e necesidad di mas grandi di un ser humano, awendia ta di ser scucha, mi a trata cu hopi persona cu a asercami, pasobra cu nan kier a dji PAPIA, y ser SCUCHA.

Algun a bisami cu nan kier a aserca mi pa un of otro orientacion sea pa sa si lo ta bon pa nan publica nan caso of ta solamente papia di dje.

Despues ta resulta cu no mester publica e asunto, cu hopi biah ta confidencial of no, pero como cu e persona ta bao di e peso y angustia di e problemanan hopi biah e no ta mira cosnan cu claridad y durante papiamento e ta bin compronde y analiza mas mihor su situacion.

Hopi ta esnan cu ta yora y ta bisami cu nan sea nunca a yora asina profundamente y no por corda for di ki tempo pasa nan a drama algun lagrima y despues di esaki a sinti nan mes alivia.

Otronan ta yora continuamente nan problemanan na cas, pero no sa con pa busca un manera pa sea pone un punto final na loke ta un strobacion den nan bida of pa busca un manera pa drecha bida of e situacion andando.

Mi ta haya cu loke no tin solucion, despues cu a movecielo y tera no mester ta un strobacion pa cuminsa completamente di nobo so ... of bon acompaña.

Esaki ta algun comentario pa loke ta trata e "Columna di Finchi" y su exitonan alcanza, un danki na tur lector cu semper ta encurashami, danki pa e palabranan di elogio, sugerencia y consohonan ora di coregi algun fay, danki pa e palabranan di cariño y atencion.

Awe tambe mi ta felicita mi excelente y apreciado Hefenan di trabao Sr. Jossy Mansur y Sra. Nuhad Mansur cu 18 aña di existencia di e Matutino DIARIO corant local y internacional mas lesa na Aruba y rond mundo.

Dios bendiciona nan semper, cu hopi salud nan famia y conocirnan tambe tur lectoran mi coleganan aprecia e Staff dinamico di DIARIO semper luchando pa bay dilanti.

Un saludo awe, pa e Pueblo di Aruba y pa tur pais y lectoran rond mundo : Dios bendiciona un y tur.



TELEFONNAN DI DIARIO
826747- FAX 828551